

# ESCHATOLOGY

## (Ahunglung ding chungchanga kihilna)

Paominlen Kipgen (PK) M.Th

Bible hi isim leh thusima konin Pathen kitahna akimu peh'in, OT a kisei, Adam le Eve koma asele le agaosapna thuchengho, Noah koma aseiho, Abraham koma anakitepna ho, Isaac Jacob henga akitepna, Lengho hengleh Themgaoho henga athusei, amimanchah ho henga athusei OT mama'a guilhun, aguilhung lou ho NT'a guilhun peh akimui. Pathen'in akamcheng tah'a aphon doh le athemgaoho kama aphon doh, ahunglung ding thu aseiho ana guilhun peh'in, Hiche ho hi ivet leh ahunglung ding imasanguva ding athusei jouse jonghi hung guilhun tei ding ahi ti akimui.

Eschatology tihin phat kichai ding'a kihilna atina ahi. Hiche hi Greek thucheng *Eschatos* akon kila, hichu achaina; hiche'a konna chu *eschata* tichun akichaina thilho atina ahi. Christian theology dungjuija hiche hi ahunglung ding thil li – thi, thutana, vangam leh damun chungchanga kihilna ahi.

Christian eschatology hi apumpi'a Christa'a kingam ahin, secular eschatology leh sakho dang'a toh kibahna aneipoi. Hiche hi Christa athokit leh *parousia* (Greek'a kon kiladoh hunglhun ahiloule um/arrival or presence- tina ahi) hichu Christa ahung kitding le leisetna aumding aseina ahi.

Thokitna'a chu Christa chu thina'a kon athoukitnin, athokit chu eiho jousejong ithokit dingu teptena/photchetna (gurance) ahi (1 Cor. 15:20). Chuleh tu ihinlai jenguva jonghi athokit hinkho chu ineikhom pi'u ahi. Hichu Ama'a chu' tahsan na'a ihinuleh hithei ding ahin, vangama ihinna diuchu ineikhompiu ahitai (cf. Col. 3:1).

Chuleh Christa chu atila ana'um ahin (Jn. 1:1), achaina'a jong umding ahi. Ajeh chu Ama alpha leh omega, abul ahiloule akipatna leh aleh/achaina jong ahi. Hijehchun Christian khat dinga Christa jaoulouva achaina/aleh chu gelthei ahipoi. N.T in ahungkit ding, vannoi thutan ding, alenggam atundoh ding, ama'a kingaite jouse chu kipana chamkim apeh ding ahi ati. Hijeh'a chu ahunglung ding ivet'u toh lhonna Christa chun hoilama eipuiju vem ivet'u, thusim jouse ama'a akichai chu ivet'u ngai ahi.

## BUNG – 1

### AHUNGLHUNG DINGA MIHEM HO DINMUN DING

#### (The future for the individual)

#### 1. OLD TESTAMENT THUHIL

Old Testament hin kidang tah'in mihem ho athi nunguva adinmun diu themcha bou anaseije. O.T sunga hin Israel ten thi jouva hinkho dinghi kinepna themcha bou ana neijuve. Amahon mihem chu athijou teng 'Thikholkhul/Sheol' leiko kichat leh lungdon na kilahna (shadow) mun, mihem chu Pathen'a kon akipai dohna mun – na chu chesuh dingin agellui (Ps. 6:5; Isai. 38:18). Ahin munthem khatna thokitna chungchanga thuhil jong akimui – Isai. 26:19, Dan. 12:2, Job. 19:26.

Inter-Testamental period (OT leh NT kikah) sunga tahsa thokitna hi Judate lah'a lhangphongin san/pom ahung hicheh cheh'in, Jesu Christa khang, NT sunga honkhat Saduceesho bouvin ana tahsan

tapouvin ahi. Thikhol khul chung changa tahsan nachu aumjing'in, ahin hiche jong chu hopni'in akihomin – Paradise (eg. Lk. 23:43) leh Gehenna/dammun- meikong lah'a genthei tah'a umna mun (eg. Mtt. 5:22) ahi. Jesu thulem mihao pa leh Lazarus thu aseina'a amatah'in Lazarus chu itidana athinunga Abraham koma uma mihaopa chu gentheina mun – Hades/Gehenna/dammuna genthei tah'a uma, akahlah hona onghom lentah'in akhen, ahi'a alangto'a kihou thei ham ti aseijin ahi.

Ahin OT khanglaija Judate chu amakho'u hi thikholkhul la kinem louvin themgaohon anaseiju "Pakai nikho" kinem tahleh tijatah'a ananga joh'u ahi. Hiche nikho chu Pathen – Yahweh – chu loupitah le thaneitah'a hunga amelmate jouse chung a gal ajo'a leisetna alenggam atundoh ding chu ahi. Ahin Amos in kumjabih 8 laijin hiche nikho chu Israel melma te dingseh hilouva Israelte amaho tahding jenga jong tijat umtah nikho hiding ahi anati (Amos. 5:18-24). Atila chu Pakai nikho hi hunglung loi jeng dinga tahsan anahi. Ahin hiche nikho chu akitepchon chonin Vangam lengpa Messiah hungding toh kithakhat dingin sei ahitai (Ezk. 30:3; Dan. 7:13-14). Ahunglung ding thuho vetsahna tampi lah'a nikhat leh chuphatlaija athoh gimnao (hiche hi asohchan lai ju, agenthei lai juva kisun ahi) chu hungbei ding, Pathen'in alenggam chu atun doh'a amelma ho jouse chung thutanna aneiding ahin, Ama'a hiho dinga chu kipana leh lungmona hiding ahi. Hiche nikho kisei guilhuna ding chu jona vannoi thusim oltah'a cheche ahi. Lenggam chu adingin alhun ache che'in Pathen thilgon chu aguilhuna ding anai cheh cheh'e.

Israel te ahunglung dinga akinepnao chu changval lhagao thikhol khula huhhinga aumding chu hilouva; Pakai nikho'a ding, Nikho thah'a ding, Missiah lenggama ding, mihem changval cheh hiche lenggam sunga ahindiu joh ahi. Christa penphat laitah'a chu Israelten Messiah hungna ding chu anakinep piu ahin; chule hiche dinmuna aumlai tah'uva chu Jesu Christa chu hunga ahi. Hijeh'a chu John Baptist in aseijuiho chu asola ahung dinga kisei chu nahiam, oleh midang kanga dingu ham agati sah ahi (Mtt. 11:3).

## **2. NEW TESTAMENT THUHIL**

### **A. Jesu leh Thokitna:**

Synoptic gospel dungjui jin Jesu thuhil hi ivetleh Thokitna hi atahsanin, thinunga mihem hinkho ding jong atah sane ti akimui. Saducees hon chingthei tah'a numei khat ji 7 nei chungthu'a patepna aneijuva matding agotnu chun (Mk. 12:18-27) Jesun thokit jouva hinkho chu leiset hinkho toh akibang poi tin ana donbutne. Mithi chu athokit teng vanna vantil te tobang hidingu ahitan, pasal leh numei chu kicheng lou ding ahi anati. Chuleh aseibena'a Pathen hi athiho Pathen hilou ahingho Pathen ahijala Abraham, Isaac, Jacob Pathen kiti ahin, Amahochu tu'a atahsao athi vanga hing nalai ahivu. Jesun Cross chung a akikhai lai jin alungheija guchapa henga "tuni'a pat keimatoh Paradise'a i'umkhom ding ahi" (Lk. 23:43) anatin; hiche hin thijouva hinna aum aphotchet ahi. Paradise hi Christa ngailu leh tahsan hon athi thiuleh Pathen angsunga aumnao mun chu ahi.

Ahin thokit aumonge ti hi Jesu thuhil vang mai mai ja itahsannu ahapon, amatah Easter jingkah'a athodoh jeh'a hichu itahsan uva kikinep'u ahi. Christa athokit jeh'a chu tahsana thi Christiante jouse jong thokit ding ahi itahsanu ahi. Christa chu ahinge, athipoi, hijeh'achu eihon jong ithijou tengu leh ihin diu ahi ti itahsan dingu ahi. Ajehchu amachu athi holah'a aga masapen ahi (1 Cor. 15:20). Ama atho banga eiho jong hinkho thah'a itho kitdiu ahi. Christa thohi Christiante dinga thijou nunga hinkho ikinepnao kibilphuna ahi.

## B. Solchah Paul thuhil:

Paul'in mihemkhat thi nunga hinkho ding kicheh tah'a ahilna chu 1 Cor. 15 na ahin, athi'a thoukit Christa kilah naho leh akhona amahenga akilah na'a aphochene. Corinth'a miphabep chun thokitna aumpoi ti'a ahill ahin, Ahin Paul'in leisetna Christa chung a ikinepnao hi ineosah uva ahileh mivangse pen pen chu ihuive ti'a anasei ahi (1 Cor.15:19). Mihem jouse hi Adam'a kon ahi, Adam chonsetna chu ineicheu uva thidinga themmo chang ihisoh keijuve. Ahin Christa'a uma chun Christa'a um thokitna hinkho chu anei khompi ding ahi. Adam jeh'a mijouse athi banga Christa vanga chu atahsan jouse hingding ahi (v.22).

Chuleh Paul'in thokitna hin ipi aseina ham chomcha ahilchetna'a (vv.35ff). Athoukit dingchu hiche tu'a itahsau hi hilouva, tahsa thah, Lhagaova tibah thah, leisetna toh kibang lou hiding ahi ati. Hiche leiset tibah hi muchi banga monmang ding lhagao vouva hungthoudoh ding ahi (v.44). Christa jong chu leiset tibah'a chu thi ahin, ahungtho kitna chu lhagao vouva hungthou kit ahijeh'a anungjui hochun amu'u vachu anahet louvu ahi. Chuleh hiche vou chu imachan atintang theilou hijeh'a chu insung kot kikhah sunga jong hung luthei ahi.

## C. Solchah John Thuhil (Tonsot hinna)

Gospel ali chana sunpan Jesun tonsot hinna aseijin thu asune. Hiche hi Greek thuchenga *aiionios zoe*, ahilouleh *aeon* hinkho; tichu hinko thah atina ahi. Hiche hinkho hi asotdan hijo louva hinkho phachomjo kiseina ahi. Christian ten hiche hinkho thah Christa'a umchu ithijou teng jongleh chejom ding ahi itahsanun – hichu a'itih'a umjingding ahi. Hiche hi Christa'a umna hinkho chu ahin, 'tonsot hinna' ahi (Jn. 17:3). Jn. 3:16 na'a Jesun ipi dinga Pathen'in leisetna hi ahinsol ham aseijin, koihileh ama'a kipelut chanchun tonsot hinna aneidiuvin aseije. Hiche hinna dihtah, hinkho thah, tonsot hinna chu tu'a jong hi Christa'a ngailuho, ama'a dinga kipedoh ho henga umma ahi. Jesun keija ummun, keima jong nangho'a uminge atilona chu ahi (Jn. 15:4).

Hijeh'a chu mihemkhat chun Christa atahsan ni'a pat hiche hinna hi anei ahitan, tonsot hinna kiti hi thinung khel khel ngadoh ding, thijouva hinkho kiseina khelkhel ahapon, tu'a hi kipana ahitai. Thi hi thusim khat kichai na ahin, chuleh thusim thah khat boina beihel hinkho, akichai talou ding hinkho kipatna jong ahi. Ajehchu Christa Omega chu tonsotna umding ahin, imachan angailutna tochun asuhkhen theilouding ahi (Rom. 8:39). Christa'a hindung kiti hin tonsot hinna neiding atina ahin, chuleh Lhagao Thengin mahor einam khumuva eilosah teidiu ahi (2 Cor. 1:22; 5:5).

## BUNG – 2

### AHUNGLHUNG DING HO

#### 1. THI

Thi hi hinkho kichaina, beina ahin; itahsa, ihinna leh ilhagao kikhena ahi. Leiset chung a chomkhat ihinu hi tonsotna dinga ikigotna phat sungu chu ahi. Ithi tengule Itahsa chu leiset toh chohal ahijin, ilhagao leh hinna (spirit & saul – thakhat/kibangin seitaleuhen) chu - Eccl. 12:7; Lk. 16:19-31 –

dungjuijin muni lah'a khat pen pena achei. Hichu Michonset ho hinna/lhagao chu dammun na (Lk. 16:23) chuleh michonpha ho hinna chu Paradise'a Abraham angsung, Christa toh kikhethbeh gucha lunghei pa chena ding munna chun acheji'e (Lk. 16:22 cf 23:43).

### **A. Thina hi hoija hungkon ham?**

Thi hi jatni aumin huchu ani'a Eden honna hungkipan ahi.

i. Lhagao thina. Gen. 2:17 na'a naneh nini leh nathi ding ahi kitihl Lhagao thina kiseina ahi. Eden honna Adam leh Eve chu atahsa hon athipai pon, alhagao hon joh chu thi'a ahi (cf. Eph. 2:1).

ii. Tahsa thina. Gen. 3:21 Pathen'in gancha khat athatnin Adam leh Eve chu asilpeh/avonpeh'e akitin, hiche hi thi masat pen kiseina ahin, Mihem lah'a athi masapen chu Abel, Adam chapa chu ahin asopipa Cain'in atha ahi (Gen.4:8).

### **B. Ipi jeh'a thina hi hunglung ham**

Lhagao thina hi Pathen thu manloujeh'a lung ahi cf (Jas. 1:15). Hijeh chun thina hi chonset jeh'a lung ahi. Tahsa thina hi Doctor ahilou leh mihem gelding damona jeh hinte. Ahin thina dinga dammo najong hi Pathen'in Eden honna chonset jeh'a asemdoh, mihem agaosapna ahi (cf. Ezk. 18:20; Rom. 6:23; Heb. 9:27).

### **C. Thina kihilchetdan (description of death)**

- i. Imu – Jn. 11:11; 1 Thess. 4:14
- ii. Hinna/lhagao lahmang – Lk. 12:20
- iii. Leiset In koidoh na – 2 Cor. 5:1; 2 Pet. 1:14
- iv. Hungkile kit louna ding mun jonna che – Job. 16:22
- v. Thipna'a lut – Ps. 115:17
- vi. Lhagao pehdoh na – Acts. 5:10; Luke. 23:46.

Hijeh hin tahsa thina hin imi sungnung ima atongkhapon (Rev. 6:9-11), tahsa leh Lhagao/hinna kikhenna maimai bou ahi (Jacob 2:26). Huhhingna changho Lhagao chu Christa umna muna achei (Lk. 23:43; 2 Cor. 5:8; Phil.1:23). Hiche tahsa leh Lhagao kikhenna hi Rapture gei hiding (1 Thess. 4:13-17), chujou leh thokitna umding (Rev.20:4-6), chuteng itahsao lehilhagaovu hi Pakai toh loupina changkhom dinga toudoh ding ahi ( 1 Cor. 15:35-44; 50-54; Phil. 3:21). Lhatdamchate Lhagao chu kipahtah'a Pakai Jesu Christa toh kipahkhom ding ahivu (2 Cor. 5:8).

Mijouse thokitna hi umtei ding ahin, huhhing changho chu tonsot hinna'a thoudiu (Jn. 6:39; Rom. 10,11,19-23) chuleh michonsete thutan na'a ding dingleh tonsot na gotna changdinga thoudiu ahi (Dan. 12:2; Jn. 5:29; Rev. 20:13-15).

Michonse ho Lhagao chu thokitna anivei channa kah'a dingin thohgimna'a akikoijin (Lk. 16:19-26; Rev. 20:13-16); thokitna achan tengu leh alhagao'u leh atahsao chu kimat kitding (Jn. 3:28,29), chuteng thutan na maija ding diu (Re. 20:11-15), amaho chu dammun maikong lah'a lelut hidiu (Mtt. 25:41-46), Pathen hinna'a kon atonsotna paidoh hitadiu ahi (Dan. 12:2; Mtt. 25:41-46; 2Thess.1:7-9).

## 2. THOKIT

Thokitna kitihi chi tampi aphan ahi. Hinlah thokitna kitihi mihem tahsa thi jou nunga tahsa'a athokit ding kiseina ahi. Loikhat chu themmo changa thoudoh ding aumin, loikhat chu themchanga thoudoh ding jong aume (Dan. 12:2; Eccl. 12:7). Tahsan ho chu themchanga thoudoh ding, atahsan louho chu themmo changa thoudoh dingu ahi.

Thokitna kiti hi chini'a khenthei ahi. Thokitna masaleh thokit nunung. Thokitna masa chu mithengho thokitna akitin, chuleh thokitna nunung chu mithiho thokitna tin akihei (Rev. 20:5,6).

### A. Thokitna masa: mitheng ho thokit

- a. Christa thokitna: Christa athi'a lhanna konna tahsa tah'a athokitna hi thokitna masapen hung umdohna ahi. Thulhun luija mithenghon gamasa tia anasei jingu chu Christa thokitna dinghi anavetsah'u ahi (Ex. 23:19)
- b. Christa tahsanna mithengho thokit: Rapture tengleh Christa tahsanna tahsa'a anathi tasaho chun Christa kouna awgin ajah tenguleh khatvei thu'a van vouva kikhel sohdiu, tahsa limpu'a hung thoudoh cheh ding ahivu (1 Thess. 4:16; 1 Cor. 15:51-55).
- c. Thulhun luija mitheng ho thokitna: Thohgentheina phat kichai ding konna Christa Second coming a ahung tengleh thulhunluija mitheng thisa ho chu kumsang lenggama lutdinga hung thoudoh cheh ding ahivu (Dan. 12:1,2). Chuleh hiche phat sunga chu tribulation sunga thudih jalle Christa mina kihat ho chu OT mithengho tohungthou khomdingu ahi (Rev. 20:4)

### B. Thokitna nunung: chonseho thokitna

Hiche thokitna nunung, michonsete thokitna kiti hi kumsang lenggama Christa lenvaihop kichai tengleh lhangpi thokitna, leiset kisemtilla kipatna tahsanna neilou anathisa jouse thokitna chu ahi.

Hiche atahsan louho jouse chung thu kitanna ding chu, laltouna thupitah, abanna bang khat hungkido doh ding, chuche laltouna majja chu mithiho alen, aneo achungthu kitan dinga hungding cheh ding ahivu. Mitin tahsa'a anatoh athilbol dungjui cheh'uva achung thu'u kitanna, athemmonao dungjui cheh'a gotmun akijot cheh diu ahitai (Dan. 12:2; Rev. 20:4,5; 11-15).

### C. Thokitna jouva tahsa pum umding dan le lhagaova umding dan

- a. Tahsa pum umdingdan: Tu'a thisan le gu le phe'a ihin tobanguhi ihitah loudiu, lhagao vouva umding joh ihitaove. Ajehchu Pathen'in eigon peh'u vanvou/lhagaovou kiti khat tahsa pumlim tobanga sethei louva kismkhat chu ineidiu ahitai. Hiche tahsa chu chultheilou, mottheilouva tonsotna ikivon diu ahi (1 Cor. 15:38,40). Ithodoh tengu jongleh hiche lhagaovou hi ineijuva tahsa lim banga ithodoh cheh diu ahitai (1 Cor. 15:44,49).
  - i. Tu'a tahsa phe tobanghi hitalou ding (1 Cor. 15:37).
  - ii. Pathen peh tahsaphe limchom khat hitading (1 Cor. 15:38).
  - iii. Setheilou, mottheilou, tahsa pum hitading (1 Cor. 15:42).
  - iv. Loupina tahsa pum hiding (1 Cor. 15:23).
  - v. Lhagaova tahsa pum hiding ahi (1 Cor. 15:44).

- b. Lhagaova umding dan: Thokitna jouva lhagao le tahsa umding danhi het hahsatah ahi. Ahin Bible hildanin, mihem hi lhagao tahsapum (Spiritual body) khat kipeding ahi ati (1 Cor. 15:44; Jn. 20:27 KJV)

### BUNG – 3

#### HOUBUNG LAHTOUVA AUMDING (Rapture of the Church)

Rapture kiti thucheng hi Bible'a akimulou vangin Latin paova *Raptio* kiti thuchenga kona kiladoh 'Lahtou' tina ahi (1 Thess.4:14-17). Hiche rapture nikho chuleh Pakai chun leija um amithengte puidoh dinga avantil thengte chutoh kilhonna loupitah'a vanlai jolla leiset phajep louva hungkum suhdiu, chuleh amithengte chu meiloma huikonga atoltouva vanlai jola kimutodiu ahi. Hiteng chuleh amitheng thisaho hungthou doh masadiu, chuleh ahingnalai ho avouvu kikhela Pakaitoh kimuto dinga lengtou dingu ahi.

Jesu Christa chu kum 7 thoh hasakhang (tribulation) masang ngeija atahsa tah'a khatvei vanna kon hungkum ding (1 Thess. 4:16; Tit. 2:13) Vanlai jola meilah'a kon Ahoubung hi alahtou ding tahsan jouse Pakaito vanlai jola kimuto ding ahi (Jn. 14:1-3; 1 Cor. 15:51-53; 1 Thess. 4:15-5:11). Chuleh amitheng tetoh loupitah'a hungkile kitdiu (2<sup>nd</sup> Coming) leh Rapture kah'a hi tahsan teho chu anatoh dungjujuva tohman kihom ding ahin (1 Cor. 3:11-15; 2 Cor. 5:10). Hichu Kelngoinou moupui golvah jong akiti (Rev. 4:1;19:9; 1 Thess. 4:15-17; 1 Cor. 15:51-5).

Ahin Rapture hi atahsan lou jong aumin, atahsanga ahi'a hiche hi tribulation jou teng hiding ahi ti'a tahsana jong aume. Ahin eiho tahsan dungjujin hiche hi tribulation masang ngei hiding ahi ti ahin, aphotchetna themkhat veo hite.

1. Rev. 1-3 sunga Houbung 7 ho henga lekhatot/gaathusei na adeh'a 1:19 na'a "hicheng jouse nungleh thilsoh ding" chuleh bung 4 adeh'a 4:1 na'a "Hiche jouchun..." atikhun Houbung khang leh houbung khang kichai jounung thilsoh ding aseina ahi.
2. Jn. 14:3 na'a Jesun "Keima umna'a chu nangho jong naumthei nadinguva kahunga kahung pui diu nahi" atileh 1 Thess. 4:17 na'a tahsana anathisa holeh ahingna lai kikhel ho chu Pakai toh vanna ikimu to diu ahi atikhun aphot chet ahi. Col. 3:4 nan Christa chu ahungkilah/kiphondoh teng eiho jong amatoh loupitah'a ikiphondoh khom diu ahi atin, 1 Thess. 3:13 na'a Christa amitheng tetoh ahung kitding thu aseijin, hiche hohin avetsah chu Amitheng techu Christa avela leisetna thohhahsa khang akichai jouva ahungkit teng Ama to hung kilhondi atina ahin, chuti ahileh mithengho chu khatvei leisetna kon Pakai koma anache masat teidiu ngai ahi ti akimui.
3. Rev. 3:7-13 na'a Philadelphia houbung Houbung kitah, lekha athotna, 3:10 na'a "vannoi leiset chungu cheng miho patep kholchilna" atikhun Tribulation/thohhasa khang aseina ahin, Hiche'a kona chu kahuh doh ding nahi anati.
4. Lk. 21:36 na'a Jesun "Nasochat nadingu, mihem chapa anga nadin jouna dingun a'imatih chanin kiging jingin umunlang taojingun" atin, hiche'a aseini nikho khu thohhasa khang hunglung ding nikho aseina ahi.

5. Hapta som sagi (Hapta khat chu kum sagi, nikhat chu kum khatna kisim) Jerusalem chungchanga gaothu kisei (Dan. 9:24-27) hi Houbung hilouva Israel te chungchanga kisei ahi. Hapta 69 chu Christa akipaidoh (cf. Dan. 9:26) 'a chu kichai ahitan, hapta nukhah pen chu lhunglou lai ahi. Houbung khang hi khangkisel ahin, Messiah kipaidoh'a pat Rapture geihi Houbung khang hija ahin, hiche kum 7 (hapta khat) hi tribulation phatsung ahi. Christa houbung hi hapta 70 sung ho'a akisei khah louto lhonin, hapta khat avat pa hi ahunglhun masang ngeija Houbung hi Pakai toh umkhom dinga vanlai jola lahtouva umding, hiche jouteng lebou chun hapta 1/kum sagi thoh hahsa khang hi kipan bepkit ding ahi.
6. Thoh hasakhang sunga thutanna, patepna, bolgentheina, suhthengna kiseiho hi Pathen mite, Israelte kiseina ahin (Jer. 30:6; Ezk. 20:33-38, Zech. 13:8-9), Pathen'in Christa Jesu'a atundoh houbung (Eph. 2:10), Israel thah hi hiche thoh hahsa khang alutsah ding chu tahsan aumpoi.
7. Pathen'in Lot Sodom kho'a kon ahuhdoh leh ajouva vanna kon hungju mei le kath'a akhopi asuhmang (Gen. 15:150-22) chun Pathen'in Houbung chu leisetna thoh hasakhang hunglung dinga kon ahuhdoh ding lim avetsah'in ahi. Ajeh chu Pathen'in michonpha ho chu michonsete toh asuhmang tha louding ahi (cf. Gen. 18:23; II Pet. 2:6).
8. Thuphon bung 4 le 5 na'a upa 24 Pathen laltouna kimvella tou kisei khun Old Testament leh New Testament mitheng ho thalhenga touho ahin, Christa thempu ahi Israel leh Houbung dinga akibah na, athisan vanga lhatdam changkhom saho anatou uva vannoi thutan masanga loupina anachanu hin, Rapture hi tribulation masang ngeija lhungding ahi ti avetsah'e.
9. Phat tampi leh mun tampi hin Houbung chu Christa hungna ding ngah ding le kiging jinga ana'um dingin akiseijin (Mtt. 24:42; Mk. 13:25; Heb. 9:25), hiche hin Christa A'Houbung dinga ahungding aseina ahiji'e. Houbung chu kiging jinga ngah jing dinga akiseina hin Rapturer chu tribulation masang ngeija hung lhungding ahi ti avet sah'e. Ajeh chu hiche Jesu avela ahungkit masanga thoh hasakhang/tribulation leh thutanna thu imacha aseitha jipon ahi.
10. Christa ahoubung ahung masat leh loupini tahleh thanei tah'a ahungkit ding kah'a hi phatchom khat ngai tei ahi. Ajeh chu hiche sunga chu vangama tribulation kah'a thilkhoh tah ni alhuntei ngai ahi.
  - a. Jesu thutanna maija mithengho chungga thutanna (Bema thutanna). Hiche thutanna'a hi tahsan chate chu khatcheh'a amaija dingding "tahsa'a anahin laija anatoh ga, apha leh ase hojouse chungga tohman asan ding ahi (1 Cor. 3:11-14; 2 Cor. 5:20; Rom. 14:10). Chuleh hiche phat sunga hi tohman jatchom chomchek lallukhuh hopna umding ahin, hiche lallukhuh ho chu:
    - i. Lhaitet golseh'a lhaino sanding Lalukhuh (Kemang theilou lallukhuh); 1 Cor. 9:24,25; Heb. 12:1.
    - ii. Lhagao huhdoh ho dinga Lallukhuh (Loupina lallukhuh); 1 Thess. 2:19
    - iii. Kigingsa umjing ho dinga lallukhuh (Chonphatna lallukhuh); 2 Tim. 4:8.
    - iv. Akifah ho dinga lallukhuh (Hinna lallukhuh); Jacob. 1:12
    - v. Kelngoiching dihtah ho dinga lallukhuh (Loupina lallukhuh); 1 Pet.5:4
    - vi. Huhhing changho jouse dinga lallukhuh (Sana lallukhuh); Rev. 4:4.

- b. Kelngoi nou golvah ankong umna (Christa leh a Houbung golvah) kum 7 sunga um ding ahi (Rev. 19:7-10; 2 Cor. 11:2)

Rapture hi Christa avela ahungkitna khatveina chu ahin, hiche'a hi leiset chung hunglung louding, vanlajola amitheng te ahinkou tho ding ahin; ahung tahtah ding pahi aloupina'a hungding ahi (Rev. 19:11-21; Mtt. 24:27-31; Zech. 14:4-5).

Hiche Rapture hi michonpha ho thokitna ahilouleh ahingho thokitna hiding ahi (Dan. 12:2/ Rev. 20:4-6). Enoch hi mithengho to vetchep, tahsa thina tohlouva kikhelding ahui vetchepna ahi.

Pathen'in lungsetna phatsunga kitepna thah'a mihemte akiteppi'a na atoh vanga Adam to kitepna, Noah to kitepna, Abraham to kitepna leh Palestine na kitepna chu umjing nalai ahi. Hijeh'a chu mipengthah lou Christa'a hinna neilouho chu Adam to kitepna, chonsetna'a chu umnalai ahin, lhagao thina chu ato teitei ding ahi. Abraham to kitepna, Palestine na kitepna hi apumpi'a guilhung loulai ahi (Ps. 2:5; Dan. 11:35; Mtt. 24:15; Mk. 13:14; Rev. 17:14).

## **BUNG – 4**

### **THOH HAHSА KHANG NASATAH**

#### **(Great Tribulation)**

Hiche thutan nahi ahunglung masang ngeija Houbung chu lahmanga umding (1 Thess. 4:16; Jn. 14:1-3) hiche jouleh chun kum phabep (Kum 7) sung 'Jacob dinga hesohna phat' (Jer. 30:7) chu hunglung ding ahi. Hiche phatsung chuleh Pathen'in Ami lhenho agamsunguva ana umho toh kiguijopna chu anei jom ding (Ezk. 20:33-35), hiche phatsung hileh mitamtah huhdoh'a umding (Rev. 7:9,13,14) ahi'a amaho chu Christa tahsa'a chu panglou ding, Pathen soh joh hidingu ahi (Rev. 7:15).

Hiche phathi\_Houbung lahmanga aumjou jouleh kipan paiding ahi. Israel dinga Pathen toh kitepna ana molso joulou jalu, athuman lou jalu leh Christa anapai doh jaluva thoh hasakhang chu hiding ahi. Chuleh hiche jonghi Jacob'in achate lah'a Joseph angailut dehset jeh'a asopi danghon athangset peh uva ahot boluva, agimbol nunguh, chuleh Ishmael ho henga dang 20 mana ajoh doh'uva, humpin anetai atiuva asangkhol chol kelnogi thisan anunat uva apa Jacob apeh'ule Jacob'in kachapa hi athi tahbeh ahitai ti'a ni 7 jen pul anadouna chu tua hi Israel ten kum 7 jena asahdiu, gentheina athohna diu hunghi ding ahi (Jer. 30:7 cf; Gen. 37:31-35).

Thoh gentheina kiti hi Pathen'a kipatna migiloute thutanna, Pathen thu mangloute chung Pathen lunghanna/lungthahna hung kibunglha ding chu kiseina ahi (Dan. 12:1; Mtt. 24:21-29; Jn. 16:33; Acts. 14:22). Hiche thoh gentheina kiti hi thilsoh dangho toh hung kibang louhel ding, thohhahsa chungnungpen kiti auma umkhalou, avela jong umkit talouhel ding ti'a themgao hon gaova anamu jingu chu hunghi ding ahi.

#### **1. THOH GENTHEINA PHATSUNG**

Hiche thoh genthei/hahsatna phat sungi Rapture le kum sang lenggam kikh kum 7 sung (hapta khat) kiti'a kiseijing phatsung chu ahi. Hiche phatsunga hi Israelten vannoi mitetoh kinoptona

thugahna khat ahin neidiu, ahivanga aphant alhinkah kum 3 ½ masapen kichai kon dontah'a chu hiche kinoptona lekha chu Anti-Christ (dansusepa) in ahin bokeh'a, keimahi Christa chu kahi, keimahi neihou diu ahitai ti'a ahoulose chu thagamna dinga thupeh ahinnei ding; chu'a kona chu kidouna chu hung kipanding ahitai (Dan. 9:27; 2 Thess. 2:4).

Ajeh chu Pakai Jesu leisetna aumlaija Pathen chapa kahi atijeh'a Israel chaten aki Pathen sah'e, Pathen ataitome atiuva songa selih ding anagot banguva chu, Anti-Christ jonghin Pathen chapa Christa chu kahi ahinti jeh'a chu Israelten songa selih ahingot dingu, chutia chu kidouna hung kipanding ahi (Jn. 8:56-58).

Hiche kum 3 ½ masa chu ahung kichai dontah chuleh lenggam kipana thupa chu hettosah mini chun ahinsei phongle lhonding ahi (Rev. 14:6). Chuleh hiche kipana thupa kisei phongle ho jala chu vannoi mite'a kona Israelten gimbolna, hahsatna ahin thohan diu ahi (Rev.6:9-11).

## 2. THOH GENTHEINA PHATSUNGKIHOP KHENDAN

Jerusalem sesa sahphat kitna dinga Israel ten Artaxerxes' akona thupeh ahin mupat naova kipatna thohgenthei khoh chungnung (great tribulation) kichai ding kona Israelte hung pentahna ding changei chu kum hapta 70 kisulut ding ahi (Dan. 9:27; 12:11-12; Mtt. 24:15, 21-22).

Judaten thupeh ahin mupatnao chu March, 14, 445 BC ahin, chuleh Jerusalem lamlen hole apalho ahin sah jou'uchu hapta 7 (kum 49) alutnin, chuleh Christa Cross'a ahung kikhet behna chu hapta 62 achebe kitnin, agomin hapta 69 alhingtai.

Hapta 70 lhina dinghin Daniel hapta kiti thoh gentheina phat hapta khat (kum 7) kiti chu tuhin aum nalajin ahi. Daniel hapta kum hapta tia kisim hapta kum 7 dingchu anoija banghin akihom khene.

- a. Phat masapen: Hapta 7 chu kuma simin, kum 49 ahin (7X7=49) hichu 445 BC'a kipatna BC 396 sung chu ahi. Hiche phat sungahi Judaten Jerusalem lamlenho leh apalho chu asah jou'uh ahitai (Neh. 2-6).
- b. Phat ni channa: Hapta 62 chu kuma simin kum 437 ahin (7X62) 396 BC'a kipatna AD 30 sung chu ahi. Hiche phat sunga hi Judaten a Messiah'uh chu Cross'a ana khetbeh'uh ahitai (Mtt. 27; Mk. 15; Lk. 23; Jn. 19 cf. Dan. 9:26). Kum hapta hi 69 hi nikho'a isim doh'a ahileh agomin nikho 173,880 alhingin ahi. March 14, 445 BC'a konna hinsim patding ahi.
- c. Phat thum channa: Hiche phathi Judate kumle lha kisimna holah'a kisim thalou, tu'a kouchom/Houbung phat kum 2000 tobang cheding konhi kiseina ahitai. Hiche Houbung phatsung hi hapta 69'a le 70 kijopmat na ding kikh'a um Pathen thilgon lungsetna phat kitichu ahi. Hiche phathi Pentecost ni'a kipatna Rapture changei chu hiding ahi. Hiche Houbung phat kitihim themgao hon jong gaojeng cha'a jong anamu phahlou'u, Paul in thuguh, thu ki'im ti'a anasei jing chu ahi (Eph. 3:8-10; 1 Pet. 1:1-12; Col. 1:25-27).
- d. Phat li channa: Hapta khat chu kuma simin kum 7 ahin, Rapture le kumsang kikh sunga um tribulation/thohhahsa phat kiseina ahi. Hiche phat sunga chu Anti-Christ in ama miding ahin kihol chiding, chuleh Christan jong amite chu ahin kikhop tupding ahi.

## 3. THOH GENTHEINA PHAT KIMINVO NA CHOMCHOM HO

- a. Kelngoinou lungthahna nikho (Rev. 6:16,17).

- b. Patepna nikho (Rev. 3:10).
- c. Genthei hesohna nikho (Dan. 12:1).
- d. Muthim lhangkhal kiheh nikho (Joel. 2:2).
- e. Kisuh gamna nikho (Dan. 9:29).
- f. Jacob lungdongna phat (Jer. 30:7).
- g. Genthei khoh chungnung nikho (Dan. 12:1; Mtt. 24:21-29).

#### 4. THOHGENTHEI NA AHUNG UMLONA DING JEH

- a. Israel ten ana deimouva Cross'a thadinga anapeh dousao a'Messiah'u chu aleng le ahuhhingpu diuva ahin kisan theina diuva achunguva boltheina hohi hunglung ding ahi (Malachi. 4:5,6; Mtt. 24:14).
- b. Vannoi mite Pathen hephalouho leh adouho chungna Pathen lungthahna/lunghanna kikhol khomho kibuh lhahna ding nikho hung lhuna ding ahi (Jer. 25:32-33; Isai. 26:21). Hiche nikho teng chuleh lungset them Pathen kitipahi lunghang theile halvamna meikong Pathen kiti chu hungghi ding ahi (Heb. 12:29).

#### 5. THOHGENTHEINA PHAT SUNGA LHAGAO LAMMA THIL HUNG'UM DINGHO

Pakai Jesun, leisetna aumlaija Keima kappa min in kahungin neina sangpouvin; ahin midang khat ama minin hungleh anasang naovin nate anati chu hiche phatna hi Anti-Christ hunglung ding ahi (Dan.11:36-39;Jn.5:43;2Thess.2:6-12).

Hiche thohgentheina phat sunga houjouse houkhat seh'a ahung kiloikhom diuhi tu'a jong aumjousa ahitai (Rev. 17:1-18; Jn. 17:21). Bible in Babylon Notinu atihin houjouse thangoi tah'a kiloikhomna hi aseina ahi (Rev. 17:13-17). Hiche phat sunga chu mijousen sahem chu ahou chehna dinguva thupeh khautah hung kipe ding ahi (Rev. 13:4-8).

Amapa (Anti-Christ) chun hiche phat sunga chu lheplahna le joubolna kidangho ahinbol ding (Rev. 13:13; 2 Thess. 2:9-12), hiche phat sunga sahem hounom lou hole melchihna sahen No. 666 lanom lou sese chu suhgenthei'a umdiu, thil imacha achoh thei loudingu, joh jong ajoh thei loudiu ahi (Rev. 13:15-17; 18:1-24).

## BUNG – 5

### CHRISTA ANIVEINA LEISETNA AHUNG NA DING:

#### (Second coming/Parousia)

Tribulation phat kichai teng Christa chu leisetna hungkit ding David laltouna chu ahunglo ding (Mtt. 25:31; Lk. 1:32,33; Acts. 1:10,11; 2:29,30); chuleh a Messiah lenggam chu kumsang khat sunga leisetna atundoh ding ahi (Rev. 20:1-7). Hiche phat sunghi leh mitheng ho vana amatoh ana umtasa ama toh hungkile kitho chun ama toh Israelte chung leh leisetna namtin vaipi chungna lengvai apohkhom diu (Ezk. 37:21-28; Dan. 7:17-22; Rev. 19:11-16) ahi. Hiche lengvaipoh na hi Anti-Christ le

themgao lhemho leh Satan chung leh leiset chung agaljo na aum jouteng hiding ahi (Dan. 7:17; Rev. 20:1-6).

Bible a kihasei pen chu Christa leisetna nivei ahungna dinghi ahipene. Christa leisetna khatvei ahungna chu Israelten nahsah louva anaboluva anasan nom loujeh'uva chu ahungkitna dinghi kihasei dehset ahi. Tu'a aniveina'a ahung kitna dinga chu loikhat in ahin kisanthei diu, ahivanga akisan nomlou hochu asuh manghel ding ahi. Ahuhhing pu'uh akisan theina diuva chu Israelte suhgentheina hung um masatei dingu ahi.

### 1. CHRISTA HUNGNA DING PHAT

Christa leisetna ahungna dinghi Tribulation kichai konleh kumsang lenggam kipat dingkon hiding ahi. Ahungna ding phatle anidan tah vang chu koimacha hettheija umlouhel ahi (Mtt. 24:36; Acts. 1:7).

### 2. CHRISTA LEISET PHA A HUNG DINGDAN

- i. Tahsa a mijouse mutheile hettheija hung ding ahi (Acts.1:11).
- ii. Loupintah le thaneitah chuleh galjoutah'a hung ding ahi (Mt.24:30;Rev.1:7).
- iii. Anikho le anidantah chu mihemte hettheija hung umlou hel ding ahi (Mk.13:33).

Ajeh chu aman melma ho jouse chu akengto noija akoi masang sea aman gamvai apoh ding ahi kiti phat chu hung hiding ahitai (1 Cor.15:25-28;Rev.19:14).

### 3. CHRISTA LEISETNA AHUNGLONA DING AJEH PHABEPHO

- i. Ami Israelte henga ahung kiphon dohna ding jeh (Rev.1:7).

Ajeh chu Josheph asopi ten ana hetthem lou jeh uva dangka 20 a anajoh doh nunguva, koi ahijong ahethahlou nunguva amale ama ahenguva akiphondoh banga chu Christa jonghi ami Israelte henga hung kiphongdoh ding ahi (Gen45:4;Rev.1:7).

- ii. Ami Israelte huhdoh dinga hung ding ahi

Tu dinmun jenga jonghi Pathen'in Israel chate hi apumpai ahipoi (Rom. 11:1-2). Tulai jengin jong lungsetna'a kilheng amoh chengse aumnai akiti (Rom.11:5). Ajehchu chiding namdangte akimkah sea Israelte kimkhat chunga Pathen lunghana chua ahibouve (Rom 11:25-28). Christa chun ami Israelte chu leisetna agalmiteova kona ahuhdoh masat ding (Jer.3:7;Zech.14:1-4); chuleh Pakaijin ami Israelte kithe chehho chu ahin khoptup dingu (Isaiah 11:11-16); Pakaijin Israelte chu nikhat sunga ahin huhhing diu, chutia chu kitepna thah khat ahin semdoh peh diu ahi (Isa.66:8-9; Jer. 31:31-34; Zech. 12:10-13:1).

- iii. Sahem, themgao lhem chuleh asepaiteho thutan dinga hungding

Hiche sahem, themgao lhemho chule asepaite chun leiset lengho chu galbol dinga ahin tildoh dingu, Armageddon kiti muna chu ahin khoptup sohding, (Rev. 16:16), hiche Jerusalem khopi leh ami Israelte suhgamna dinga namtin vaipiten ahin umkul diu (Zech. 12:1-9; 13:8-14:2) ahi.

Galchu ahinjo konuleh Christa chu asepaite toh vanna kona hung kumsuh diu (Rev. 19:11-16); sahem chuleh leiset lengho le asepaite chun Christa le asepaite chu gala ahisat diu, ahivanga Christan ajo diu, ahingsana meikong sunga alelut diu ahitai (Rev. 19:19-21). Chuteng tah chuleh alamkai pao Satan chu kumsang khatna dinga kokhuh tobeija kileh lut ding ahi (Rev. 20:1-3).

iv. Namtin chungu thutanna hungding ahi

Pakaijin hichephat teng chuleh thutana khat ahin dodoh ding, hichea chu Gentile teleh Israel lama anapang louho chungu thutanna ahin bolding ahi (Mtt. 25:31-46). Israelte lama anapangho, ana kitohpiho chu Kelngoi nammite Israel mite lah'a kismtha'a kumsanga lenggama chu chan aneikhom diu; Israelte douva anapangho vangchu keltah nammite kitidiu, Kelngoinou lunghanna meikong dil sunga chu kileh lut diu ahi.

v. Kumsang lenggam tungdoh dinga hung hiding ahi

Pathen'in Alhacha David henga ana kitepnasa "Amahin, Keima mina Inn khat eisahpeh ding, kem ana lenggam laltouna chu atonsot geija dinga kaphudet pehding" tia anaseisa lenggam chu tungdoh dinga Christa chu ahung phatnin Ami Israelten ana dei louvin anapampai taovin ahi (2 Sam. 8-16; Mic. 5:2 cf. Lk.1:31-33).

Bethlehem a naosena ahungpena, Cross'a athi'a chu tonsot hinkemlouna thu ahinpoh ahin, tua avela ahung tengleh chonphatna thutan ding le kumsang lenggam sunga thih tenggola vaipo dingle vaihom dinga hungding ahi (Isai. 9:6; 11:1-4). Lungset neitah'a kingainem tah'a hunga ahitan, tu'ahi lungsetna neilouhel banga tahsan louho dinga thutana hungding ahitai.

## BUNG – 6

### KUMSANG LENGGAM (Millennium)

Gentilete chungu thutanna phat ahungkichai teng chuleh Christa David laltouna ahinlo panding (Rev. 20:1-15), hiche chu kumsangkhat lenggam sunga lutdingho chu Israel thengtah lhendohho chu hunghidiu, chuleh Gentil Israel lama anapangho bou chutoh hiding ahivu. Hiche kumsang hi Latin paova '*Millennium*' kiti Kumsang khat tina'a kon kiladoh ahi.

Pathen thu anaman loujeh uva anamangsa lenggam chu letun dohkit hiding ahi (Deut. 28:15-68). Hichehi Pathen'in Israelte henga anatepsa molso nading ahi (Isai. 65:17-25; Ezk. 37:21-28; Zech. 8:1-17). Israelten athuman loujeh uva chu patchomkhat na dinga koidoh anahiu ahin (Mtt. 21:43; Rom. 11:1-26), alung ahin hei kit jeh vanguva hiche lenggam chu alo thei dingu ahi (Jer. 31:31-34; Ezk. 36:22-33; Rom. 11:23-29).

Hiche Pathen vaihomna lenggam chu; kipana, chonphatna, lungmonna, kitahna le hinkhosotna hiding ahi (Isai. 11:65; 17-25; Ezk. 36:33-38). Hichu satan ahung kilhadoh kitna kichai ding ahi (Rev. 20:7).

#### 1. KUMSANG LENGGAM CHRISTA AHUNG CHANDING JE

Archaelaus, apa Herod thinunga Rome'a agache'a aleng channa dinga a lenggam ding aga kisuh det banga chu; Christa jonghi vanna apa Pathen henga hiche kumsang sunga aleng channa ding chu agakisuh tup ahitai (Jn. 14:1-3; Dan. 7:13; Lk. 1:1:32). Kumsang lenggam chule Pathen'in achapa Christa chu apu/apa David laltouna chu pehlhah ding ahi (Lk. 1:32). Ajehchu Pathen'in ana tepsa ahitai. Hiche ding jeh'a chu Christa chu vanna chekit ahitan, chuleh aphot ding teng chuleh leisetna alaltouna'a toudinga hungkit ding ahi (Mtt.19:28; 25:32).

## 2. KUMSANG SUNGA KIVAIPOH NADING DAN PHABEP

- a. Christa chu apu/apa David laltouna'a hungtouva lenga hungpang ding ahi (Lk.1:32; Rev. 5:9; 7:9; 22:3-5).
- b. Christa chun thih tenggola vai ahin hopding ahi (Rev. 2:27; 212:5).
- c. Christa chun leng banga lengvai ahin pohding ahi (Rev. 20:0).
- d. Christa chun ahoubung, amithengte chutoh vai apoh khomdingu ahi (Rev. 2:27).
- e. Kumsang kipat ding konleh satan chu kokhuh tobeija kumsang khat sunga kikoilut ding (Rev. 20:1-3) chujeh'a chu kumsang sunga chu chamna le monna, bitna chule kipana dimset ding ahi (Isai. 11:1-8; 65:17-25).
- f. Kumsang lenggam sunga chu Pakai hetna hung dimset ding ahi (Isai.11:9; Habb.2:14).

## 3. KUMSANG LENGAM KIMINVONA CHOM CHOM HO

- a. Pathen lenggam (Lk. 19:11; Jn. 3:3).
- b. Christa Lenggam (Rev. 11:15).
- c. Ahung umding leiset (Heb. 2:5).
- d. Semthahna gam (Mtt. 19:;28).
- e. Haldohna phat (Acts. 3:19).

## 4. KUMSANG LENGAM KICHAIDING

Kumsang khat lenggam chu akichai ding konleh kokhuh tobeija kihen Satan chu phat chomkhatna dinga hung kilhadoh ding, ama chun panpi ding loi le pai ahin kiholding, mitam tah alhep lhah kitding, amaho chun Christa leh amithengte chu ahin dou diu, chuteng Pathen kom vanna kona meikong hungleng lhachun akahvam diu ahi (Rev. 20:7,9).

Satan chun lhenchomte jengjong phabeppi ahin lheplhah ding, hiche milhem lha Satan chu sahem le themgao lhem umna meikong dil sunga chu ahing sanna kileh lutding ahi tai (Rev. 20:10).

## BUNG – 7

### LHANGPI'A MICHONSET TE JOUSE THOKITNA LEH

#### 1. LALTOUNA BANGMAI THUTANNA

Christa lengvai pohjou kum sangkhat jouteng Satan hungkilha doh ding (Rev. 20:7), Satan'in vannotija namtin chu ahin lheplah ding, mithengho leh khopi theng chung a gal ahin boldingu, hiche chu satan le anungjuiho chu vanna kon meikongin aval lhumding ahi.

Hichejou teng Satan chu meidila selut hiding (Mtt. 25:41; Rev. 20:10); chuteng Christa mijouse chung a thutanpan (Jn.5:22) thokitna nungpen hileh athouloulai michonsete thokitna kumsang lenggama Christa lenvaihop kichai tengleh lhangpi thokitna, leiset kismetilla kipatna tahsanna neilou anathisa jouse athosah'a, Laltouna bang maija alen, alal, ahao, avai abona achung thu'u atanding ahi (Jn. 5:28-29). Mipeng thahlou, semtila pat tahsan louho atahsa tah'a hungthou dohho chu tonsot dammuna dinga thutan lhah khum hiuva selut hidu ahi (Jn. 5:28-29; Mtt. 25:41; Rev. 20:11-15).

Hiche atahsan ho jouse chung thu kitanna ding chu, laltouna thupitah, abanna bang khat hung kidodoh ding, chuche laltouna maija chu mithiho alen, aneo achungthu kitan dinga hungding cheh ding ahivu. Mitin tahsa'a anatoh athilbol dungjui cheh'ua achung thu'u kitana, athem monao dungjui cheh'a tonsotna achan dingu gotmun tonsot meidil, Satan le anungjui ho kiselutna mun chu akijot cheh diu ahitai (Dan. 12:2; Rev. 20:4,5; 11-15).

## BUNG – 8

### VANTHAH, LEITHAH LEH JERUSALEM KHOPI THAH

Kumsang kichai, Satan leh tahsan louho achunuva thutanna akichaiteng (2 Thess. 1:9; Rev. 20:7-15) hiche leiset lui hi suhmanga aumto lhonna (2 Pet.3:10) michonphaho chu leiset thah, michonpha hobou aumna diu muna (Eph. 5:5; Rev. 20:15,21,22) umdiu ahi.

Ahin kimkhatnin hiche leiset thah kiti hi tu' aluipa kismetah ding joh kiseina ahi atiuve. Ahin ahoi chu hitaleh athah, aluito kibang lou hiding ahin, hiche muna chu Pathen toh loupai na'a michonpha, Christa tahsan jouse chu lutdingu ahi. Hiche jouteng vangam khopi (heavenly city) chu vangama kon hung kichonsuh'a (Rev. 21:2), hiche Jerusalem thah chu mithengte chenna hung hiding; hiche muna chu Pathen toh kiloi khom, khatleh khat tonsotna kiloikhom dingu ahi (Jn. 17:3; Rev. 21:22). Hiche khopi, Jerusalem thah chu kijem pah leh mounu bang hung kilang doh'a chu (Rev. 21:1) akhompai 12 cheh'a solchah 12 ho minkhat cheh kisun cheh ding, akulbang holeh alamlenho jong alet aneo tetoh sa hija ahi (Rev. 21:18,19).

Akotpi jong kikhah ngailouding, kihong jing jengding (Rev. 21:25), asunga chu hinthing phungleh hintwidung longjong kang louva longjing jengding ahi (Rev. 22:1). Nile lha khela Kelngoinou chu vahjing ding (Rev. 21:23), hiche khopi sunga chu Leiset lenghon aloupinao ahin pohlut cheh diu ahi (Rev. 21:24).

Chuteng I Pakai ju Jesu Chrusta Lhatdamna natosh jousa chun hiche lenggam chu Pa henga apehdoh ding (I Cor. 15:23-28), hiti'a chu Pathen thum khat (triune God/Trinity) chun tonsotna lengvai apoh ding ahi (I Cor. 15:28).